

Zašto je poništen tender za zemljište u Tuzli

Američki univerzitet pokvario planove Jasmina Imamovića

Ponuda AUBiH povoljnija za 150.000 maraka • Ko stoji iza firme

Američki univerzitet (AU) u BiH nije proglašen pobjednikom tendera za oko 900 kvadrata zemljišta u centru Tuzle, kod Trga slobode, iako je bio spreman platiti 150.000 KM više od drugog ponuđača. Umjesto toga, Općina Tuzla poništila je kompletnu proceduru. U AUBiH smatraju da je tender poništen jer su općinske službe i načelnik Jasmin Imamović namjeravali dodijeliti zemljište firmi Naučno-tehnološki park Tuzla, koju su unaprijed odredili za pobjednika.

- Našom ponudom, koja je dosta povoljnija, pokvarili smo im planove i odlučili su poništiti tender - kaže predsjednik AUBiH Denis Prčić.

Advokat AUBiH Faik Muhić pojasnio je na preskonferenciji da je načelna urbanistička saglasnost za ovo zemljište donesena u martu 2008. godine i u njoj je određeno da tu treba graditi zgradu za obrazovne, administrativne i slične djelatnosti. Na osnovu toga AUBiH je napravio idejni projekt i odlučio da se prijava na tender.

- Međutim, konkurs na osnovu takve urbanističke saglasnosti nikada nije raspisan. Umjesto toga, u junu ove godine formirano je preduzeće Naučno-tehnološki park Tuzla, čiji je osnivač Edin Delibegović.

Denis Prčić kaže kako do AUBiH dopiru informacije da iza ovog preduzeća, ustvari, stoje osobe bliske načelniku Imamoviću.



(Foto: A. Bajrić Bličko)

Sa pres-konferencije: Unaprijed određen pobjednik

Odmah po osnivanju te firme raspisan je konkurs za dodjelu zemljišta. Istovremeno se mijenja urbanistička saglasnost i neko na volšeban način mijenja prvobitnu namjenu objekta - kaže Muhić.

U državnoj nomenklaturi djelatnosti, kaže on, ne postoji djelatnost koja se zove „naučno-tehnološki park“, tako da ona nije mogla biti navedena ni u urbanističkoj saglasnosti.

E. HUREMOVIĆ

Dnevnik avaz, 20.11.